

Zems

Zapat meluwan kapi Zemsiyan kuye

Zapat meluwan kapi an kwiyan penan kuye ke sosok penan nen ku kukunangapmti an keyan kup nep ku zenzeyelen. An Kawawangalen zetgat yanay mnâmti makup ekjenay an kwi keyet kegogak zet mmot mtot omba penan mimiyan. Notnanay zewienen Zisasiet meniyan nen kwitnay Zems ek dapmelange alaknay Zelusalem mka temay mambien ekjengat an damunin mange egay kuye manzeip. Zemsiyan an nâmkijpepeninmak Zuda mangeengatnay kumkalanți msat sambe mebet kokotnay ekjengat kumindaye.

An kwi ma kwiyan kuye keyan zet apalak kegok kuye. Zet esemtan penan kuye. Zet notnay zapat meluwan kapiyet kejan tazinen Matiyu kuye keyet katan kukunay. Sekem kebongat Kawawangalen Zet Zapat Dolaknay Penanenen mââtâti ekbak. Zems 2:13 makumti naman Matiyu 5:7 kegogak maiyti ekbak. Zet sekam kebon ombanik Zemsiyelen zapat meluwan aikbek.

Zapat meluwan kapi yanay kapigok. Am nâmkijpepeninmak Zuda mangengatnay weyanbe weyanbe mti tatnepeme sisipenpen sokbeme ekjen katiknay bematatgalen nâmti zapat meluwan kapi kuye. Zemâtâtât notnay tazin keyan am kejin ma sekjin melen belej beme nâmkijpepemak tati keyet penan msokbembeyelen. Kwit Kilais ke zapat meluwan kapiyet tuk etay kukunay.

Zet noteknay temay kapigogay Zems zapat meluwan kejan talip:

1:1 Zet nenay bemzenzeyelen zet

1:2-8 Nâmkijpepemak mama

1:9-11 Mânep milawatmak mama ma bekopsat mama

1:12-18 Tetimaemaeyan yanin mimekbe

1:19-27 Kawawangalen zet wagay etay nânâ ke nep yek

2:1-13 Kalalangat yanay zenzenay

2:14-26 Nâmkijpepe yanay mim eek

3 Nambalamin ekdamun mimiyelele zet

4:1-5:6 Am msat kapiyelele mama mimi bekanay

5:7-20 Zemâtâtât ikjak ikjak

1 ¹Nen Kawawaŋ ma Amobotnaŋ Zisas Kilaisiyelen mulup an. Nen zapat meluwaŋ kapi ingat indamukumindesâti kuyap. In Islaeliyelen am maŋge 12 ekŋengat iŋsokŋine Zisas Kilaismak tususuŋin tazinaŋ kalaŋti lala bubuk bemti msat kataŋ mekobienanŋ talip.

**Nukŋanen kaliŋan bem tatalanŋ nâmkŋipepe
penanŋat yaŋanŋ mamsokbein**

²Kilaismagen notnne, inmagen nukŋanŋ igak igak sokbeme keyet nâme keŋ sokukuŋanŋmak ku bewe; keŋin oloŋen palen tabep.

³Kwitnaŋ kwitnaŋ keboŋanŋ nâmkŋipepeŋin mmek mmek mimindikme katikŋanŋ tabep. Keyet penanŋanŋ inmagen katikŋanŋ bemti tatat omba sokbemindawe. ⁴In nâmtekaliŋ tati kan kataŋ nukŋanŋ pumti giŋgiŋ mtabep. Keyet penanŋanŋ nâmkŋipepeen kaliŋanŋ bemti an imbi penanŋ mamaipgapmti nukŋanŋ pusât ku olabep.

⁵Ingat tunguwinangatnan am ŋenanŋ Kawawaŋgalen set ma mama mimi ekŋenanŋ mimiyet nâmtikŋanŋ mam keyet olati ekŋenanŋ Kawawaŋ dundum same egaŋ ŋep ŋoktik dolakŋanŋ am sambe penanŋ ndamti egaŋ keyet zem watot watot ku mam. ⁶Dundusâgât keŋ zut palen yek; Amobotnaŋ nâmkŋipemti penanŋ dunduŋep. Keŋ zut mbep beme ekŋenanŋ nembu mamaŋ tâgâyanŋ kumbume mamekwazin keboŋ bewep. ⁷Am keboŋgat dundunduŋin Amobotnaŋanŋ ku manâmindein. ⁸Am keyelen ŋoktikŋin kileŋ maepeemti mekozin ma ekŋenanŋ mama mimi mamip keyanŋ set kwewetanŋ mâti ku mamezin.

Mânep milawatmak mama keyanŋ penanŋanŋ penanŋ ku bein

⁹An ŋen bekopsat nâmkŋipepeŋenmak ek Kawawaŋanŋ ekme iŋŋanŋat nembraŋanŋ mambein keyet nâmti oloŋen mbe. ¹⁰Yanŋut an ŋen nâmkŋipepeŋanŋmak mânep milawat sambe tasain keyepmti sek mobot ku mbe. Kawawaŋanŋ ekme yomtonŋ beme gilik zem wage keyet nâmti oloŋen mbe. Tep elewilinaŋanŋ dâlânŋ zemti matolip sepem kegok mânep milawatnaŋanŋ yek bewe keyet sek mmobopiŋ. ¹¹Kasuwaŋ tambuŋan penanŋ kwati tep elewilinaŋ ekme aŋgasimti dâlânŋ zem msalen topme elimiakŋanŋ ke mayek bein. Sepem kegogak am mânep milawalin temaŋ ekŋenanŋ gakime mka mundumin etaŋanŋ tabe. ¹²An ŋen ek nukŋanen katikŋanŋ bemti tapme Kawawaŋanŋ eget nâme dolakŋanŋ mambein. Ek nukŋanen windeŋanŋ mambein beme Amobotnaŋanŋ mama kanzizit keyanŋ miakpewe. Ke am Kawawaŋgat gogot mampeip ekŋen indandayet zetik mge.

¹³An ŋen bekananŋat tetimaemae sokbemsame kapigok ku zewe. “Kawawaŋanŋ tatetinem nikzin.” An ŋenanŋ Kawawaŋ ku tetipepeyelen ma egaŋ kegogak an ŋen bekananŋ mimiyet ku matetipein. ¹⁴Tetimaemaeyet yaŋanŋ kapigosetgatnaŋ masokbein, ŋenanŋ an ŋenanŋ iŋŋanŋgalen mama

mimi mgasik mimiyelen tikŋaŋaŋ keŋanen tazin keyaŋ zemandamti tetipeme bekaŋaŋ mme temaŋ mambein. ¹⁵Âpme bekaŋaŋ mimiyet keŋ puŋpuŋ mamin keyaŋ penaŋaŋ yom maaiksain. Yom keyaŋ tapmetneti temaŋ bemti penaŋaŋ gakiki maaikzin.

¹⁶Notnne penaŋ, in zet keyet ku nâmyuŋguwep. ¹⁷Kawawaŋaŋ kekok ku mimiyelen egaŋ taolet dolakŋaŋ ke mandain. Keyet Kawawaŋ Bipm An kwitnaŋ kwitnaŋ busatnaŋaŋmak sambe mme sokbeye. Mme busatnaŋ ekŋen keyaŋ kan notnaŋgat busatnaŋin temaŋ manzin ma kan notnaŋgat aiaikŋaŋ manzim. Ma nin Kawawaŋ taŋam keboŋmak ku bem mek ekbanek. Ek sepem kwep matazin. ¹⁸Kawawaŋaŋ nâmtâtpeye ke zetnaŋ penaŋmagesetgatnaŋ am nâmkŋipepeen nemunambaŋane nin ndaige. Ke nin kwitnaŋ kwitnaŋ sambe Kawawaŋaŋ mge keyet ŋeŋaŋinok benup.

Kawawaŋgalen zet wagaŋ etaŋ nânâ ke ŋep yek

¹⁹Notnne penaŋ, in kapigok penaŋ nâseip, am in Kawawaŋgalen zet wagaŋ nânâyet eleŋ beleŋ bemti nâmbep. Zet zemti ŋenzinziŋ mimiyetgut kwelen kwelen mbep. ²⁰Enenogat ŋenzinziŋ palen kwitnaŋ kwitnaŋ mamip keyaŋ Kawawaŋgalen mama mimi teŋ keyelen set mamimyunguin. ²¹Keyepmti in mama mimi mgasik sambe notnaŋ ma bekaŋaŋ msat palen palakŋaŋ bemtazin peme tapme keŋ sewak palen mamti Kawawaŋgalen zelaŋ keŋinan tewaŋ kindiŋaŋ time matowezin sepem kekok keŋinan time topme mamambep. Keyaŋ keŋin aŋgalaŋindendeyelen windenaŋ tasain. ²²In Kawawaŋaŋ zet keŋinan bempaye keyet penaŋaŋ aikbep. Belak wagaŋ etaŋ nâmpemti ku nânâŋaŋ sepem mamambep beme keŋin tetipewep. Kogogat zeme nâmti keyet kataŋ mbep. ²³ŋenaŋ Zet Zapat Dolakŋaŋ Penaŋ nâmtiŋgut ku nânâŋaŋ sekem mambe beme an keyaŋ amnaŋ zimoselin gapiamen ekti naman gilik zem belakŋaŋ ekti zimoselin makandat indoin sepem kekok bewe. ²⁴Egaŋ ŋeŋzimosetnaŋ gapiamen ekpemt totti met kileŋ mamamti naman ŋeŋzimosetnaŋgat makandazin. ²⁵Ma ŋen egaŋ Kawawaŋgalen zet penaŋ yomgalen mka katikŋangatnaŋ tetimti lala mapein zet ke yaŋaŋ weyaŋnâmtâtâti mambe mti wagaŋ nânge ke ku makandatkuin. Nâmti gawepuwe an keboŋ ke Kawawaŋaŋ nâmtikŋaŋ mpemti mukulem mme oloŋen palen mambe.

²⁶An ŋenaŋ pigok mene otnâmbep, “Neŋ an nâmkŋipepemak penaŋ mamayaŋ,” zeyeyaŋgut dembusekŋaŋ ku ekdamuŋ mbe beme keŋaŋ tetipewe. An keboŋ nâmkŋipepeŋaŋgalen mama mimiŋaŋ belakŋaŋ penaŋ bewe. ²⁷Nâmkŋipepen esemteŋ ma kakanemuŋ keyet penaŋaŋ Bipm Kawawaŋgat zikatnaŋ penaŋaŋmak bembeyelen kapigok mman ŋep bein: Imbi kwambet ma nemba dumen olat olat palen mame indikdamuŋ mimindendeyelen. Ma msalengalen kwitnaŋ kwitnaŋ keyaŋ keŋin mme bekaŋaŋ bembeyelen keyet eksemti mamambep.

Am mânep milawalin temaŋ ma am bekopsat sepem kwep indatiwep

2 ¹Notnne, in Amobotnaŋ Zisas Kilais manâmkîŋpepgapmti am ekŋengat tunguwinangatnaŋ notnaŋgat ken ke ken ke ku mbep. ²Neŋ kapigogapmti zeyap, ondedakŋinan an ŋen melakandu dolakŋaŋ peme topme elimiak sopmaŋ mti kobe. Âpme egat baman an ŋen bekopsat saŋgum kâlâpmaŋ endeleletnaŋaŋ kobe. ³Âpme in an elimiakŋaŋ temaŋmagaŋ kopme ekti pigok zewep, “Geŋ pien mundumen kototat.” Kegok zempemti an bekopsat egat pigok zewep, “Geŋ kainde bap palen metotat.” ⁴In zemdelan zenze mulup mimiyet kwiyaŋ zemindeyeyepm kekok mti am ŋen mmopemti ŋen mtopemti tapmip? Kegok miyo ke bekanan.

⁵Notnne, zet pigok zema nâit. Kawawaŋaŋ am sepem zibon indakumtetime kobien? Msalen am bekopsat mamaip ekŋen ke nâmkîŋpepeen polak polak talipgapm Kawawaŋgalen zemâtâtât katnanen mama keyet keŋan mebegat indamandame kobien. Ke am egat nâmtikŋaŋ mampeip ekŋen kekok mimindandayet zetik mamimindain. ⁶Âpme in am bekopsat ekŋen zikalin galemaset maingdigip. Ekŋen ke mtot indemti nukŋaŋ sekŋinanek mambemindeip. Mme am sekŋin mamolip ilin keyaŋ nukŋaŋ indamti in an damuŋmagen zelen maingatimti melip. ⁷Mti Zisas in iŋnaŋgat zapat indatitiŋaŋ egat kwitnaŋ pembedan ke kwelatmakumpeip.

⁸Gitaŋgat maŋgembein sepem kekok am notnaŋgat gembewe. Zii zet Kawawaŋgalen Zet Itanaŋanen mamaŋ kekok penaŋ kumpepenaŋ ke gawepume ŋep penaŋ bewe. ⁹Yangut am ekŋengat ken ke ken ke mbanik beme geŋ an zii zet kululutoŋ bewanik ma kekok mnekgapmti yomm mnik kekok bein. ¹⁰Am ŋenaŋ zii zet sambe ke gawepumâpme delaŋ zemâpbe yangut zii zet kwep penaŋ ŋen kuluwe beme an zii zet kululutoŋ. ¹¹Kawawaŋaŋ pigok zeye, “Awembiŋ it kalelaŋ ku mbalup,” zemti ŋen ewe pigok zeye. “Geŋ kasa ku kuwanik,” yangut geŋ imbindi katipepepiŋ mamti kasa kuwanik beme geŋ an zii zet kululutoŋ.

¹²In kapigok nâmbep, Kawawaŋgalen zet penaŋ yomgalen mka katikŋangatnan indatetimti lala maindein zet keyaŋ zemdelan zenze kanen kosâpm keyepm weyaŋ nâmâtâti zelin sambe zewep ma mama mimi sambe weyaŋti mbep. ¹³Enenogat Kawawaŋaŋ am ŋengat aŋgalaŋ gogot ku mamip egaŋ am ekŋen ke kogogak aŋgalaŋ gogot ku mimindawe. Bamgat aŋgalaŋ gogot palen mama keyaŋ kasa kasa palen mama selaŋ ime tobe.

Nâmkîŋpepe mulupmaŋpiŋ ke nâmkîŋpepe penaŋ yek

¹⁴Notnne, an ŋenaŋ, “Neŋ nâmkîŋpepemak mamayap,” zewe, yangut egaŋ am ŋen ku mukulem mpewe beme nâmkîŋpepe kebon

keyaŋ zigok kan delaŋ zenzeŋaŋ gapmukulem mbe? ¹⁵Inmagengatnaŋ ŋenaŋ saŋgum kâlâpgat ma tu meuyet olat olat palen mame ¹⁶ekti ŋenaŋ pigok dunduwe, “Geŋ meti ŋep masenik mti tâgâyet msenikgat bakeyaŋ ambulut mane kipmaŋ beme tasenik ma tu meu omba penaŋ nimnaleksenik.” An ŋenaŋ zelaŋ etaŋ kekok zemti am notn notn ku mamimindeinaŋ kekok zeme zigoset ŋep mukulem mpewe? ¹⁷Keyepmti nâmkîŋpepeyaŋ keŋ taolet mimi mulup ku mbe ek nâmkîŋpepeŋaŋ penanaŋ yek bemberaŋ kekok zewanup.

¹⁸Yaŋgut an ŋenaŋ pigok mene zenak, “Geŋ manâmkîŋpemti mamanik mme neŋ mama mimi dolakŋaŋ etaŋ mamiyap.” Âpme neŋ pigok zewi, “Geŋ nâmkîŋpependi ke zikat namane ekma mama mimi dolakŋaŋ kemak pepap ku mambein keyepmti nâmkîŋpependi penapepiŋ.” Ma neŋ nâmkîŋpepenn zikat gama eegalen mama mimi dolakŋaŋmak temakwep mma ekbak. ¹⁹Kawawaŋ Ek kwewetaŋ zet kapi penaŋ manâmkîŋpenik e ŋep mamnik yaŋgut zet ke we bekaŋaŋ ekŋenaŋ kekokak manâmkîŋpeip. Mti keyet sebelan diŋdiŋ mamip.

²⁰An keŋdipiŋ, geŋ pigok nâmbek, geŋ belak etaŋ nâmkîŋpemti mama mimi dolakŋaŋ ku mbanik beme nâmkîŋpependi ke belakŋaŋ penaŋ bewe. Zet keyet yaŋaŋ zemkawaŋ bembeyelen zet zapat kapigok msowap ke kapi: ²¹Eweŋan sokŋ Abalaam egaŋ nemuŋaŋ Aisak sâpe sâpe bumbu munduman mopeye. Kan keyet Kawawaŋaŋ nâmpeme an teŋ penaŋ beye ke mama mimiŋaŋgatyepti kekok mge. ²²Keyepmti pigok eknup, Abalaam nâmkîŋpepeŋaŋ ke mama mimiŋaŋaŋ mukulem mpeme penanaŋmak beye. ²³Eweŋan Kawawaŋaŋ Abalaamgat pigok zeye ke katikŋaŋ beye. Abalaam egaŋ Kawawaŋ nâmkîŋpeme egat nâmpeme an teŋ beye. Keyepmti egat kwitnaŋ Kawawaŋgat notnaŋ penaŋ kogok zenzeŋaŋ. ²⁴Egit. Kawawaŋ egaŋ am ŋen nâmkîŋpepeŋaŋgat etaŋ nâmpeme an teŋ ku mambein. Egaŋ mama mimi dolakŋaŋ ma nâmkîŋpepe eget keyaŋ temakwep bermalu keyet nâmpeme an teŋ mambein.

²⁵Keyet sepmeŋ ŋen imbi set kileŋ mama kwitnaŋ Leap egaŋ Zâsuayaŋ an zut zemideme msat wilingim eksâgât mebun idikdamuŋ mimidemti zemideme set ŋeneset mebun keyepmti Kawawaŋaŋ Leap egat imbi teŋ kekok nâmpaye. ²⁶Keyepmti nin pigok nânup, sekŋ kapi nâmamaŋpiŋ ek ilak gakimti titokŋaŋpiŋ mawein. Kegogak nâmkîŋpemti mulup dolakŋaŋ ku maminup beme nâmkîŋpepeyaŋ gakimti yek penaŋ mambem wein.

Nambalamm weyaŋ ekdamuŋ mpewanup

3 ¹Notnne, ingat tunguwinangatnaŋ an zikat indanda mulup mimiyet windeŋaŋ ku bewep. Nâip, zemdelan zenze kan temanen Amobotnaŋaŋ zikat indanda an nin kwitnaŋ kwitnaŋ mmotindawe.

²Nin sambeyaŋ kwitnaŋ kwitnaŋ mene mene maman yungumtemezin.

An njenaj zikat indanda mulupmaj yungumti zet kwep njen ku manzein beme an ke an dolaknaj penaj. Kegok min beme seknej butnaj notnaj sambe nep indikdamuj mamin.

³Âs ekjen zetn gawepupuyet nâmti aen butnaj takanzi nembonj dembusekninan pemann maapum talip. Âpme bukebonj keyaj âs temanj mim guluk gilik mampeme keyet nânâj mamezin. ⁴In nembuen wanga mamain keyet kegogak otnâit. Wanga ke temanj penaj tâgâ katiknaj keyaj indakumbume mamelip. Yangut wanga mti mamain egaj wanga temanj ke deset mebegalen nân beme kwitnaj njen stia zeip ke isiknaj bugan keyaj mme gilik zemti egaj manâin keyegak esemterj mamezin. ⁵Âpme am ningat nambalam sepem kebonjagak isiknaj bugan yangut kwitnaj kwitnaj nuknajbenj penaj mamin. Nâip, tep butnaj menzok mann zinak ek isiknaj penaj yangut bukeyaj bumann zimti tep msasat temanj manzim kawan bein. ⁶Âpme ningat nambalam tep butnaj menzok mann zinak bukebonj. Egaj sekj notnaj sambe mtot indemti bekanaj omba penaj mamin. Egaj sekj sambe mama mimi bekananset maindamepme walepmâzin ma egaj sekgalen mama mimi bekanaj keyaj tepnok bume zime mama mimin bekanaj penaj mambein. Zet bekanaj kebonj zenzeyet nambalamanj tep butnajanj teziñ jandanjengatnaj mapendoin.

⁷Songom sepemanj iknaj iknaj tuengatnaj ma katiknajngatnaj ma age ma nombe mee ke amnaj mme sewaknaj besâti nep mamsewaknaj mambeip. ⁸Yangut nambalam kapi an kwiyanj nep msewaknaj kumbempepeyelen. Ek tagogopiñ guluk gilik mti bekanaj mti mimiek mamin. Nombe menemae keyelen zet tunaj bekanaj am indime gakikiyelen keyet kataj.

⁹Nambalamnaj Amobotnaj Bipm masesewatsanup ma nambalam iknaj keyajak Kawawanaj am iknajngat sepem mimindeye ekjen ke manzentalatindenup. ¹⁰Dembusek kwep keyajak sesewat zet ma zentalalat zet matozin. Notnne, mneti nin mama mimi kegok mbanupmagangat. ¹¹Tu zikatnaj kwep keyet tu penaj ma tu yoyonj temakwep ku makwalup. ¹²Notnne, simam zup tepmanen sanjanen penaj nep wenak? Ma sam tepmanen simam penaj nep wenak? Ma nembu aknajanj tu niniyelen dolaknaj benak?

Nânâ dolaknaj Kawawanmagangatnaj makozin

¹³Ingat tunguwinañgatnaj an njen nânâñanj dolaknaj ek njen mamain ma yek? Mamain beme egaj mamananj ekdamuj mme dolaknaj penaj bewe ma mobotnaj ku mbe ma ñotik dolaknaj mam keyet penajanj am notnaj ekjen zikat indame eknâm mbep. ¹⁴In keñ kuku mti am notnanjgalen mama mimiyet eiyak mti nen nâyap nâyap mamip keyet nâme nânâ penaj nâmtatnup manâip. Kegok mamip beme ke nânâ penaj

yek; dâsuki keyepm sek mobopiŋ. ¹⁵Nânâ sepem keboŋ ke gwaengatnan kwatoge kekok ŋep penaŋ ku zenzeyelen yek. Nânâ keboŋ ke msalengatnaŋ, anmagengatnaŋ ma Sadaŋ ekmagengatnaŋ. ¹⁶Keŋ kuku mti nâyp nâyp palen mnik beme keyet keŋaset mama mimi bekanan mamsokebein ma mama kileŋ mama masokbein.

¹⁷An nâmâtâzin egaŋ mama mimi dolakŋaŋgalen nânâ ke Kawawaŋmagengatnaŋ toge keyelen mama mimiŋanen kapigok masokbein: Keŋ kwatetepmaŋmak mama ma keŋ sewak palen mama ma keŋ taoletmak mama ma mtoti mama ma aŋgalaŋ gogot palen mama ma mama mimi dolakŋaŋ mimi ma ken ke ken ke ku mimi ma kwalan kwalanpiŋ mama. ¹⁸Keŋ sewak palen mamayet maomkakalip ekŋenaŋ keŋ sewak keyet alikŋaŋ maondeip keyet penaŋaŋ teŋ mama ke mamsokbemindain.

**Am msalen kwitnaŋ kwitnaŋ kakikiyet tikŋaŋ
manâip ekŋen Kawawaŋgaŋgat kasaŋane**

4 ¹Inmagen kasa kasa mam maip ma âmanda manda masokbein ke yaŋaŋ kwilekiyet? Keŋŋinanen sekgalen kwitnaŋ kwitnaŋ titiyet tikŋaŋin indamandame tisât sebet dindiŋ mamip keyaŋ ke tati mme âmanda manda mamip. ²In keyet keŋin mawazinaŋgut keyet penaŋaŋ toŋaŋ kumambeip. Keyepm in dopmaŋ mekum kokum mimiyeleŋ maweyaŋbemtalip ma dopmaŋ kekelim dopmaŋ kekelim mtingut keyet penaŋaŋ ku tiwien. In kasa kasa ma mdândândâ mulup mtingut penaŋ time kwaopme ku manimwiaŋip sepem keboŋ. Ke dundundupiŋ belak kileŋ mamaip keyet penaŋaŋ kekok mamip. ³Naman ŋen mandunduiŋ waŋgut penaŋaŋ ku matip. Ke keŋinanen bekanan kapigok tapme keyepmti mandundum aleip. In kwitnaŋ kwitnaŋ tisât mandundup ke ilinaŋgat tikŋaŋinaŋgat mâti etaŋ mandunduiŋ keyepmti penaŋaŋ ku matip.

⁴In Kawawaŋ bamkumpemti tususuŋin maelenŋeip, msalen kwitnaŋ kwitnaŋ bekanan mti mambe am keyaŋ Kawawaŋ mabamkumpein. In ke nâip? Keyepmti an ŋen msalengalen kwitnaŋ kwitnaŋ kapiyet notn notn mpewe beme Kawawaŋgat kasaŋaŋ bewe. ⁵Kawawaŋgalen zet muluwaŋ kukuŋaŋ tazinen ke esemteŋ ku mâti zeye, egaŋ zet ke galak zeme zeye, keŋnanen Emetak Teŋ beye keyaŋ egat zapaŋ etaŋ penaŋ mamayet windenaŋ penaŋ mamin. ⁶Mti nembetnaŋ keŋ taolet omba penaŋ maminndain. Keyet Kawawaŋgalen Zet Itnaŋanen muluwaŋ pigok penaŋ mimiŋaŋ tazin, “Kawawaŋ egaŋ am mobotnaŋ mamip ekŋen bandimin mamâtâtindein. Ma am mtoti mamaip ekŋengatgut keŋ taolet mamindain.”

⁷Keyepmti in Kawawaŋgat kandaŋan meti mambep mme Sadaŋ indetetim indiksât kopme kan keyet ek ekti ku kuŋzuŋbep. Katikŋaŋ

bemtapme ke ekti kingatindemti kunzunbe. ⁸In Kawawaŋmagen sokŋanik mepme egaŋ kegoak inmagen sokŋanik kobe. Am yomton, in bekaŋaŋ mti keŋin time kilen mamekzin in keŋin peme Kawawaŋaŋ weyaŋ zulut kaput mme mama mimiŋin kwetetepmaŋ bewe. ⁹In mama mimiŋin mgasik keyet otnâmti si kemberŋ mbep. Oloŋen zeyerŋ palen mamayet beme kemberŋ palen tabep. Ma oloŋen palen mamaip beme si kundundu temaŋ mbep. ¹⁰Amobotnangat kandeŋaŋ mtoti mame egaŋ mwatonzemindewe.

Nolin zet bekaŋaŋ ku diindowep

¹¹Notnne, in zet bekaŋaŋ ku zewep. An ŋenaŋ notnangat zekukuŋaŋ mti zelen pewe beme ek zii zet mtopewe. Enenogat Kawawaŋgalen zii zelaŋ notn notn mmamayet zenzenaŋ ke egaŋ aŋgosoye kekok bein. Geŋ zii zet aŋgosowanik beme geŋ zii zet gawepupu an ku bewanik. Geŋ an zemdelaŋ zenze an benik ke yomaŋmak. ¹²Kawawaŋ iŋaŋ etaŋ zii zet ndaye keyet toŋaŋ ma Egaŋ etaŋ ningalen an zemdelaŋ zenze an bein. Ndatim tatagalen winde ma ndaketim ndendeyelen winde e ekmagen etaŋ tasain. Geŋ kwindanŋ nodangalen zet zemdelaŋ zenzeyet mulup ke gaye?

Sek ku mobogalen golaŋ zet

¹³Inmagengatnaŋ an notnaŋ ekŋenaŋ kapigok manzeip, “Alak ma seŋenen kapi met msat ke nup kan kwep mamti mânep mulup mti mânep milawat temaŋ timti gilik zemti kobanup.” ¹⁴In seŋenen ma âgânen kwileki ŋen zigok sokbemindawe ke in nâip? Geŋ gitaŋgat mamandi msalen mambanik kapi teepmaŋ ke ku nânikgapmti buzak tat. Am ningat maman kasek keboŋ belatnik ekmann moti madiŋpein keboŋ. ¹⁵Keyepmti in kapigok zeme ŋep penaŋ bewe, “Amobotnaŋaŋ nâmdeme ŋep beme nin ewe alik mamti mulup ke ma ke ŋep mbanup.” ¹⁶Yaŋgut in zet mobotnaŋ zet iŋŋak ŋen penaŋ zemti sekŋin mammolip. Sek mmobot zet ke mgasik penaŋ. ¹⁷Keyepm an ŋen ek kwitnaŋ kwitnaŋ dolakŋaŋ ke mimiyeŋen setnaŋ nâmtati mimiyeŋet wisat mbe beme ek yommak bewe.

Am mânep milawalin temaŋ ekŋengat golaŋ zelin

5 ¹Am mânep milawalin temaŋ in sek sindem sokbemindawe keyet eweŋaŋ pigogat kemberŋ palen mamti si kundundu omba penaŋ mamambep. ²Mânep milawalin ke etimbemti yek bemâbe ma saŋgum kâlâp elimiakŋin sopmaŋ ke msatgat zapat bemâbe. ³Ma mânep ma gol silwaŋin saŋgip saŋgip kwabe. Âpme saŋgip saŋgip keyaŋ ilinaŋgat yaŋaŋin msokbemindemti tep keboŋ bemti indazimâbe. In kan delaŋ zenzeyelen bududuk tabeme keyaŋgut in mânep milawatgat mulupmaŋ mti time maŋge temaŋ moge. ⁴Nâip, mulup an ekŋenaŋ

muluwengatnaŋ meu penanaŋ akumindame in keyet tosaŋaŋ indamti butnaŋ ilin elengemtiwien keyaŋ ingat kwizet temaŋ penaŋ takuip. Âpme geŋ tosaŋin ku indanik beme ekŋengalen gawekum gaio keyaŋ kululuŋengalen kasa kuku an ekŋengalen Amobotnaŋ egat wakŋan topme manâin. ⁵Msalen kapi in nukŋaŋ ŋen ku aikti omakumbembe mulup igagen mamip. Kan in zemindondoyelen kanen nâme bududuk bein keyaŋgut in keŋinaŋgalen tikŋaŋ mâti tapmaip ke sekem bo palanŋume sememti gunabikŋaŋ mambem tazin. Âpme bamgat maindonip keboŋ. ⁶In am kwetetepmaŋ ekŋen zelen zemindomti kasa mamimindeip. Ekŋen am yommpin belak tunggupmane maindom walepme ekŋenaŋ dowin mimipin, belak matalip.

**Nin nukŋaŋ sokbemndame keyet nâmann
betetnaŋ beme windembenŋ tabanup**

⁷Notnne, in Amobotnaŋ kobe keyet damuŋ nâmisimti mambep. In kapigok maegip, an ŋenaŋ mulup mti kwitnaŋ kwitnaŋ ondempeme mawaŋ toti mme kwakwatgat damuŋ matazin keyet katanŋ in damuŋ tabep. ⁸Âpme Amobotnaŋ kokotnaŋgat kanaŋ kegogak sokŋan bein keyet in damuŋ nâmisim mamti keŋin mkatikŋaŋ bemti tabep. ⁹Notnne, Amobotnaŋaŋ inimagen zemdelanŋ zenze mulup msâgât kosâpm keyepm in mamti wisat zet ku mbep. Zet zemdelanŋ zenze An ek ilak sokŋanik penaŋ kozin. Pe nâmti tapmip ma yek?

¹⁰Notnne, golaŋ zenze an ekŋenaŋ Amobotnaŋgat zet zapatnaŋ zemkawaŋbewien ekŋenaŋ sek sindem wisatnepinŋ timti titiyek mbien yaŋgut ekŋenaŋ nâmisim tabien sepem kegogak in nâmisim mambep. ¹¹Nâip, sindem keyet keŋan tati windemak mambien ekŋengat Kawawaŋaŋ nâme dolakŋaŋ penaŋ bein. Zop egaŋ sek sindem palen tati nâmisim tage ke nâip. Mme bam Amobotnaŋaŋ kwitnaŋ kwitnaŋ omba penaŋ saye ke nâip. Amobotnaŋ ek ningat kembenŋ mindemti angalaŋ gogot penaŋ mamimndein.

Zemkatikbembe kileŋ ku mbep

¹²Notnne, zet penaŋ ŋen kapigok mimiyet zema nâit. In kululuŋat kwitnaŋ kumti zelin kaliŋaŋ ku bandim mbep. Ma msatgat kwitnaŋ ma kwitnaŋ ŋeniyet palen kumti zelim ku bandim mbep. In penaŋ, “penaŋ” zeit; Yek, “yek” zeit. Zet penaŋ ku zeip keyet Amobotnaŋaŋ zelen indewe.

Am teŋ ekŋengalen dundunduŋin windenŋmak

¹³Inmagengatnaŋ an ŋenaŋ nukŋaŋ keŋan tabe egaŋ Kawawaŋgat dundum sawe. Ma ŋenaŋ oloŋen palen mambe egaŋ Kawawaŋgat kwizet buŋamaŋ mwati sesewat silik kuwe. ¹⁴Inmagengatnaŋ ŋenaŋ zawat mbe egaŋ an ŋenaŋ bembe notnaŋ zeme kot ondektati egat mti dundundu

mulup mbep. Mti Amobotnanaŋ mukulem mpepeyet dundum sawep ma âlip katnangat kelaknaŋ isiknaŋ bugan keyaŋ kaput pewep.^a ¹⁵Âpme nâmkîŋpepemak tati dundundu mulup mbep beme an zawatmak ke Amobotnanaŋ weyaŋpewe. Ma an ke bekananŋ ŋen mge beme yomaŋ katikpewe. ¹⁶Keyepmti in alik besât nâmti yomin zemsokbemti dundunduyen mukulem mukulem mbep. An teŋ mamain egalen dundundunaŋ penanaŋmak masokbein.

¹⁷Golaŋ zenze an ŋen itnanaŋ maŋge kwitnaŋ Ilaiza ek kegogak an nin kaboŋak. Âpme egaŋ msalen map ku totogat nâmti dundume msalen map tototpiŋ nup kan tuk ma eyoŋga 6 kasup takwage. ¹⁸Âpme bam ewe map totogat nâmti dundume kululuŋengatanan mawaŋ toti msat kume naman kwitnaŋ kwitnaŋ dolaknaŋ kwapmâge.

An set kileŋ mege beme mtati selenegak pewanup

¹⁹Notnne, inmagengatananŋ an ŋenaŋ zet zapaŋ katnaŋ penaŋ katikpemti mama mimi bekananŋ mge beme in gilik zemti wabep. ²⁰Keyepmti in zet kapi weyaŋ nâit. An ŋenaŋ notnaŋ a yomtoŋ gilik zemti wati kwabe beme egaŋ notnaŋ ke gakikiyet zapaŋ tatatnanen gilik zemwabe. Mama mimi kegok mme Kawawaŋaŋ yomaŋ sambe manzulupme mepmâzin.

^a **5:14** Zuda am ekŋenaŋ âlip tepgat misikme kelaknaŋ topme keyaŋ melesenok manzulutindetemien.